

欽定剿平三省邪匪方略

正編

五

1. The first part of the text discusses the importance of maintaining accurate records of all transactions and activities. It emphasizes that this is crucial for ensuring transparency and accountability in the organization's operations.

2. The second part of the text outlines the various methods and tools used to collect and analyze data. It highlights the need for a systematic approach to data collection and the importance of using reliable sources.

3. The third part of the text discusses the challenges and limitations of data collection and analysis. It notes that while data is essential, it must be interpreted carefully and used in conjunction with other information.

欽定剿平三省邪匪方略正編卷一

丙辰年

嘉慶元年正月二十五日

壬申

署湖北巡撫惠齡

奏言據荊州府屬枝江宜都二縣稟稱訪知民人聶傑人劉盛鳴等糾約匪徒私造紅白布帽打造器械欲圖滋擾經該縣等會同營員往捕竟敢率眾抗拒現在宜昌鎮屬之兵大半派撥湖南每營存兵不過二三十名難以調撥

臣

與

荆州副都統德福面商先帶滿兵一百名卽日  
馳往督捕並囑密派二百名以備續調途次松  
滋又聞宜昌府屬長樂長陽二縣民人黃庭柱  
劉光先周大用等私造軍器鄉民已將黃庭柱  
父子並從犯趙正祥等拿獲送縣訊與枝江匪

徒同黨臣卽飭臬司張長庚迅赴長樂等處督

率嚴拿臣於正月十三日馳至枝江聶傑人等

在縣城附近村莊放火搶劫臣帶領滿兵鄉勇

等馳往搜拿途中見匪徒百餘人正將搶得糧

石搬運卽飭令放鎗圍剿除傷斃外擒獲長樂

要犯周大用及李正科等訊知聶傑人居住洋

鄭畝劉盛鳴居住包蘆坑所搶糧石運往伊兩

家藏貯聶傑人等俱在臭石坡屯踞隨將該犯

等派交鄉勇帶回縣城監禁卽馳往臭石坡緝

拿並無蹤跡復分途捕至洋鄭畝包蘆坑二處  
該犯等均未逃回亦無家屬惟有看守房屋之

黨夥梅庭建等五名當卽拿獲屋內積聚糧石

甚多並起獲鐵銃竹鎗矛刀白布旗帽並黃綾

黃布符帖等件當將糧石給賞鄉勇梅庭建等

卽行正法梟示確訪聶傑人等實在下落旋據

宜都縣稟報連日有匪徒數百人在城外放火

鄉勇往捕被傷查宜都城內僅有署總兵曾攀

桂帶兵五十名合之該縣存兵共止八十餘名

因於臣帶來滿兵內撥出五十名先往協同防

守並於前次派防苗疆鶴峯州兵內調回一百

名以資合剿臣現有滿兵五十名亦不敷剿捕

隨札知副都統德福即將預備兵二百名速令

前來一俟滿兵行抵枝江鶴峯兵馳至宜都卽

知會曾攀桂等分投剿捕爲一鼓殲擒之舉至此案起事之由現據周大用等供稱聶傑人劉

盛鳴黃庭柱劉光先等因苗匪不法約會鄉民

防範繼見鄉民願從者多遂密謀不軌上年十

一月間在山洞打造刀鎗等物分埋家內復恐

鄉民畏蕙妄稱有白蓮教法書符藏身可避鎗

箭約於三月中旬起事旋被該縣訪聞往捕因



而抗拒<sup>臣</sup>查該犯等一時烏合且有被脅入夥

之人查驗所造鎗礮等物亦皆不堪使用自可

立就誅鋤其長樂長陽二縣匪徒現在有無拿

獲容俟臬司張長庚具稟到日卽行奏報奏入

上命軍機大臣傳諭惠齡曰惠齡駐劄荊州本爲策

應湖南軍務今枝江等處適有逆民聚衆搶劫之

事惠齡得以就近查拿事機實爲順利但該犯等

以防範苗匪爲名見鄉民願從者多遂密謀不軌  
未必不因荊州宜昌等處文武官員大半派往軍  
營兵丁等亦多有徵調存城兵少以致心生窺伺  
乘間滋擾沿及四縣雖現在拿獲多名而聶傑人  
等尚未就獲其餘夥黨尚多若不探明該犯等實  
在藏匿所在悉數圍拿盡法處治何以敢奸宄而  
淨根株但荊州亦屬緊要德福未便遠離可不必

帶兵同往惠齡務將首從各犯搜拿淨盡嚴行懲治俾奸民共知儆懼不可將就了事

二月初二日戊寅湖廣總督畢沅奏言查此案匪

犯皆係烏合之徒又爲大江隔住不難立就捕擒但連及四縣分投撲滅以速爲貴此時祇有

惠齡一人在彼恐難兼顧現飭鎮臣袁敏相機

迎會臣於正月二十二日馳往枝江等處會同

惠齡商辦分剿事宜並酌抽現在辰州之湖北  
兵二百名又札荊州副都統德福挑派滿營兵  
三百名前赴枝江會合剿辦奏入報

聞

初五日辛巳惠齡奏言逆匪聶傑人劉盛鳴在枝

江宜都二縣連界大山內江家壩地方屯聚離  
城一百餘里從枝江進剿應由望佛山蕭家巖

方家大山杜家巖等處前往從宜都進剿應由  
白田聶家河黃家莊栗子山等處前往凡屬經  
由之處該犯等分遣匪黨壘卡把守必須將此  
數處匪徒悉行殲戮方可進逼賊巢查

臣

續調

之滿兵二百名已經德福派委協領果爾明阿  
帶領馳抵枝江其調防宜都之鶴峯營兵一百

名亦已到縣

臣

復撥滿兵五十名令防禦珠隆

阿色拉布等帶赴宜都會同署總兵曾攀桂先

剿白田聶家河屯聚匪黨臣卽親率果爾明阿

帶領續到滿兵二百名並鄉勇等於正月二十

三日黎明直上望佛山拆毀石卡殺斃賊匪數

十人鼓勇追捕時蕭家巖屯聚匪徒聞官兵進

剿齊來迎拒官兵奮力剿殺逆匪越嶺奔逃又

追殺七八十名因前途山徑叢雜天已將晚撤

至望佛山屯劄曾攀桂等已將白田匪卡奪獲  
殺斃四十餘名臣查逆匪等恃有山路紛歧脅

從甚衆逞其詭詐伎倆使官兵往來追逐若非  
稍添兵力轉恐蔓延隨於各標營內酌調兵八  
百名飭令星速前來協剿至臬司張長庚行抵  
長樂長陽交界地方督同府縣緝匪節據鄉民  
擒送有名匪犯劉光先等八十餘名又緝獲五

十二名俱解赴宜昌府城收禁該二縣民情安帖且深知大義互相稽查將逆匪擒獻實堪嘉獎當飭將各義民賞給銀牌並令該司將未盡匪犯全行拿獲速回宜昌審辦彈壓

同日陞任安徽巡撫署湖北布政使汪新奏言  
荆州府屬之公安江陵等縣爲南省軍營文報  
往來孔道而枝江地界與之相近茲撫臣旣親



赴督捕則荆郡要地必須專員彈壓臣現卽星

馳前赴荊州稽查呼站並就近策應南省軍務

兼可督飭該屬分途堵緝再查荆宜各營弁兵

現在存營無幾臣於省垣督撫兩標內挑兵三

百名密爲預備均奏入

上命軍機大臣傳諭畢沅惠齡曰長樂長陽二縣匪  
犯業經陸續就獲民情安社惟聶傑人劉盛鳴二

犯在枝江宜都連界山內屯聚尚須兵力圍捕此等烏合之衆不過在附近出梁藏匿非如苗匪倚恃深山密菁聚散無常者可比惠齡前已調滿洲兵三百名今又於各標營內添調兵八百名汪新又密備兵三百名兵力不爲不盛此時畢沅早已到彼會同籌辦該督撫務宜倍加奮勉迅速查拿至賊匪蔓延四縣糾合多人及經官兵往捕又壘

石抵拒其逆謀必非一日皆由地方文武平日漫  
無覺察所致迨釀成事端又以事起倉猝爲詞意  
存規避著畢沅惠齡於獲犯後嚴切跟究務得確  
情據實具奏

初十日丙戌畢沅奏言臣於正月二十九日行抵

楚北之公安縣境一路體察民情極爲安帖接  
准惠齡札會知逆匪聶傑人等聚匿枝江宜都

交界之深冲等處山坳抗拒官兵圖延殘喘並  
知惠齡先已帶調滿兵三百名續調各標營兵  
八百名又據宜都文武各員稟報宜都勢較孤  
危賊氛亦近適臣所調滿兵三百名已於二十

七八等日全抵枝江隨飛飭連夜速赴宜都並

分派臣備將臣隨帶兵二百名亦令兼程前往

臣卽馳赴枝江與惠齡面商剿捕事宜以期一

鼓撲滅

同日汪新奏言現在惠齡等調兵多名應需口

糧必須妥爲籌濟

臣

現飭附近水次各屬撥解

米石趕運應用又火藥鉛子爲軍營要需已飛

飭於省局現存軍火內撥解來荆備貯均奏入

上命軍機大臣傳諭畢沅惠齡曰聶傑人劉盛鳴二

犯在枝江宜都附近山內藏匿不過么磨蟻聚前

此惠齡僅帶兵一百名前往卽將匪犯擒獲多名  
今已先後調撥滿漢官兵千餘名而畢沅於得信

後又於辰州抽撥兵二百名並續行挑撥滿兵三  
百名何以事隔多日尚未迅速辦竣此時畢沅已  
早與惠齡會合自更可督兵分投搜捕至軍火糧  
石汪新已上緊趕運撥解足資接濟畢沅等務須  
奮力圍擒剋期蕝事無令日久滋蔓

十四日

庚寅

畢沅奏言

臣

於本月初三日行抵枝

江入境後隨處安撫體訪輿論無不痛恨聶傑

人等肆逆不法共切同仇之志

臣

隨遍加慰諭

並令各自聚集丁衆團練鄉勇保衛村莊查聶

傑人劉盛鳴等盤踞枝宜交界江家壩一帶深

山並於扼要之區分遣匪徒把守必須將各卡

逆匪全行剿滅方可直搗巢穴探聞逆匪皆一

時烏合其中逼脅被擄者正復不少必須急爲  
解散以孤其勢已剴切出示遍行曉諭告以被  
脅入夥者速行投首准其免罪如能擒送有名

賊目除以功抵罪量其情節分別獎賞至逆匪  
醜類雖多器械尚少我兵俱帶有鎗礮不難一

鼓殲除

臣

現與惠齡熟商於枝宜兩縣總路緊

要各處相度形勢酌留兵丁堵截一面派員分



投統領相機約會同日進攻

同日惠齡奏言探聞匪徒於二月初一日在望

佛山以南之謝家沖地方搶糧

臣

當卽帶兵前

往擒捕逆匪紛紛竄散追殺四十餘人初二日

卯刻匪目曾應懷趙大科等率領匪黨數百人

直至望佛山撲奪營卡

臣

督率兵勇擒捕鎗箭

齊發並用礮擊斃賊數十人曾應懷中鎗倒地

被官兵擒獲趙大科返身欲走亦卽被擒匪衆  
奔竄官兵又追殺數十名將會應懷趙大科卽

在軍前正法是日署總兵曾攀桂帶領防禦珠

隆阿守備王吉鼎等迎捕撲卡賊匪殺斃二十

餘人追至山坳猝遇匪徒千餘突出曾攀桂奮

勇剿捕連中鎗傷落馬王吉鼎衝入賊隊手刃

數人旋亦中鎗均卽陣亡珠隆阿及千總王起

龍各率官兵衝殺匪徒始行潰散珠隆阿等將

各兵駐劄姚家店地方以防賊人來城滋擾查

逆匪因<sub>臣</sub>等分駐要路不能潛出搶劫是以分

遣醜類兩處滋擾或埋伏山坳或邀截後路實

堪痛恨除飛催後調各兵星夜前來協剿外現

准畢沅知會帶有綠營兵二百名並就近調撥

滿兵三百名卽日陸續全到<sub>臣</sub>卽帶領進剿務

將首從各犯逐一殲擒至長樂長陽二縣又經  
該縣等督同鄉民擒獲黨匪三十餘名臬司張  
長庚卽帶回宜昌審辦均奏入

上命軍機大臣傳諭畢沅惠齡曰賊首聶傑人等不  
過烏合之衆惠齡先已調撥滿漢官兵千餘名而  
畢沅續調之兵又有五百名自應上緊搜捕倘實  
在兵力不敷不妨就近於各標營內一面抽調

一面奏聞至署宜昌鎮副將會攀桂守備王吉鼎中  
鎗陣亡殊爲可惜著畢沅等於事竣後咨部加一  
等議卹

十六日

壬辰

上命軍機大臣傳諭畢沅惠齡曰畢沅等現在督兵  
剿辦賊匪聶傑人如兵力不敷可就近於接壤之  
河南南陽鎮標內添調兵丁一面奏聞一面飛咨

景安迅速派撥前往再現派巴圖魯侍衛章京等  
二十員馳赴湖南軍營差遣該員等皆由荊州經  
過並著畢沅惠齡商酌如需帶兵之員即可於該  
侍衛等過境時酌留數員於帶兵更爲得力

十七日癸巳畢沅惠齡奏言臣畢沅由枝江縣城

馳抵望佛山與臣惠齡會商查望佛山離逆匪

屯聚之江家壩尚隔大山數重約有六七十里

前因臣惠齡將蕭家巖匪卡拆毀該犯等卽於

方家大山及附近之栗子山長嶺沖一帶分遣

匪徒拒守埋伏以冀邀截官兵後路臣等隨令

督標副將額勒金保佐領額貝同知鄭成基等

帶兵往搜栗子山一路叅將許文謨驍騎校滿

棟阿守備關存等帶兵往搜長嶺沖一路約定

方家大山會合臣畢沅隨後派兵策應臣惠齡

親統滿漢官兵四百名初七日黎明直入蕭家  
巖山口分遣守備林朝輔鄧興相先於左右山  
坳搜拿伏藏逆匪是日天降大霧匪徒不料官  
兵突至倉猝迎拒林朝輔首先衝入將執旗賊  
目殺死官兵鼓勇前進鎗箭齊發匪徒捨命狂  
奔經官兵追殺及落巖墜澗死者不計其數時  
方家大山卡內聚匪千餘人亦持械前來抗拒



臣

惠齡帶兵迎殺林朝輔鄧興相剿散山坳匪

黨從左右夾攻匪徒退上山梁適額勒金保許

文謨等已將栗子山長嶺沖兩路匪夥剿散帶

兵前來會合臣惠齡督率官兵直上山梁賊匪

紛紛逃竄計殺賊共數百人生擒向宏明賀直

中等七名隨於方家大山劄營並派兵設卡以

防匪徒窺測兵勇等出力殺賊最多者均優加

獎賞其向宏明等七犯卽於軍前正法再查北  
省叅遊都守多已調赴南省軍營現在帶兵需  
人應請

簡發曾經出兵之叅遊四員都守八員來楚以資剿  
捕奏入

上命軍機大臣傳諭畢沅惠齡曰畢沅等督率將弁  
直入山內奮力剿殺斃賊多名所辦差強人意著

賞給玉搬指大小荷包其打仗殺賊之滿漢兵丁  
各賞一月錢糧以示獎勵但該匪等四處勾結嘯  
聚多人斷非起自近日畢沅兩任湖廣總督惠齡  
亦兩任湖北巡撫均係伊等及福寧三人任內之  
事實難辭咎此時若能督率官兵奮力攻剿將首  
逆剋期全獲餘黨搜捕淨盡尙可將功抵罪倘辦  
理遲緩或致賊匪蔓延伊二人自思當得何罪所

有該管地方官並著畢沅等於事竣後查明據實  
叅奏至請簡發叅遊都守一節此事朕早經慮及  
昨已降旨令畢沅等於發往湖南軍營之巴圖魯  
侍衛章京等行抵荊州時酌留數員派委帶兵此  
內除東三省人員外尚有健銳營章京前鋒校七  
員將來遇有營員缺出皆可補用著畢沅等即將  
此七人留於枝江帶兵既可得力而遇缺亦可酌

量奏補

二十一日

丁酉

畢沅惠齡奏言

臣

等因連日大雨

難以進兵探訪逆匪蹤跡並獲奸細數名均稱

驍傑人等見官兵勇銳異常現已遁入灌灣腦

一帶山內藏匿並於杜家巖等處虛設卡隘俟

我兵長驅深入該逆犯等即繞至我兵後路抄

襲等語

臣

等查灌灣腦在江家壩之西十五里

若由村家巖取道進剿益覺遙遠因訪有小路  
至灌灣腦不過二十餘里卽係逆匪盤踞之處

適據 卓 派往宜都聶家河防守之縣丞蔣振萬

稟稱二月初十日見有匪徒二三百人直至聶  
家河意欲過河奪卡該縣丞等督率兵丁鄉勇  
排列烏鎗俟其半渡卽行擊打逆匪見有準脩  
退入半山之瑞峰寺內潛匿該縣丞探知瑞峰

寺僧人廣寧向與聶傑八往來勾結從賊入鞞  
今各匪向寺內藏匿情殊叵測隨於是日三更  
帶同兵丁鄉勇乘夜過河潛將火彈拋入瑞峰  
寺屋上登時烟焰四起逆匪等驚惶奔出官兵  
鄉勇前後圍打逆匪不知官兵虛實捨命上山  
逃去察看鎗斃逆匪四十三名焚斃二十二名  
並寺內糧石無筭惟該處官兵無多恐匪徒聚

衆而來卽難抵禦必須添兵庶無貽悞等情又據臬司張長庚稟稱初十日辰刻有離宜昌府

城九十里之宋家嘴對馬山等處各有匪徒數

百人分往當陽縣屬之馬家河遠安縣屬之清

溪東湖縣屬之鴉鵲嶺等處滋擾現委署巴東

縣黃應文會同營員帶兵四十名及鄉勇四百

餘名前往堵剿并稱風聞東湖縣屬之望家山



離縣二百餘里爲鄖陽府屬之保康縣襄陽府

屬之南漳縣荆門州屬之遠安縣交界山上有

雲臺觀一座觀內道士與村民等勾結聚匪數

百欲圖四出擾害現在東湖縣城中祇有兵一

百三十名遠安當陽縣城僅存兵數十名不敷

防剿均請發兵往援等情

臣

等接閱之下不勝

憤急查該匪徒等或係聶傑人等黨類因本省

兵單乘虛蠢動以圖牽掣進剿官兵雖東湖當

陽遠安三縣均在枝江宜都之北中隔大江該

處匪徒勢不能與聶傑人等合為一處但應急

為固防臣等當飛飭沿江各州縣速將北岸船

隻齊泊南岸不使匪徒偷渡一面飭令該三縣

多雇鄉勇務將城池竭力保守以免踈虞臣等

此時正擬搜山進剿若將兵派往處不特兵

分勢單且恐逆匪等益加備禦撲滅稽時而體  
察各該處情形均關緊要又不能不量予接濟  
除於臣等現有兵內撥出二百名分往長陽東  
湖二縣協防一面札知荊州副都統德福再撥  
滿兵二百名並知會襄陽鎮總兵彭之年一體  
派兵往援當陽遠安二縣現又知會河南陝西  
兩撫臣及南陽興漢二鎮臣每鎮派兵一千名

星夜前來用資分剿臣等仍遣人探明路徑激

勵官兵先往灌灣腦一帶直搗賊巢擒拿首夥  
各逆犯分別辦理再行察看情形分往東湖當  
陽遠安等處將各逆匪一律剿除以慰

聖廑斷不敢靜候豫陝兵到始行前往搜捕致有耽  
延

同日汪新奏言荊州所屬江陵公安等邑均與

枝江相近凡衝僻要隘先經飭屬安設卡巡嚴  
加盤察茲恐匪徒乘船逃竄復於下游總要各  
處添設水卡選派員弁兵役逐節嚴防臣仍不

時親加督察以期周遮遏截不使一名漏網再

查枝江宜都二處兵數漸多應需米石軍火業

已委員解往預爲備貯其宜昌府城上游扼要  
重地現有官兵鄉勇嚴密堵守所需火藥鳥鎗

集賢堂考異卷一  
亦已分撥趕解足敷應用均奏入

上命軍機大臣傳諭景安秦承恩曰現在湖北剿捕  
逆匪該省兵丁不敷調撥著景安秦承恩速卽行  
知興漢鎮德光南陽鎮阿克棟阿遴選將弁帶領  
健壯兵丁二千名迅速前往剿捕

同日

上命軍機大臣傳諭畢沅惠齡曰南陽興漢與襄陽

鄖陽毗連該督等所調兵二千名順流而下行程  
便捷現已傳諭景安秦承恩照料過行並派總兵  
阿克棟阿德光帶兵前往諒不日即可到營兵威  
壯盛畢沅惠齡惟當併力前進專辦枝江宜都之  
賊急將聶傑人劉盛鳴二犯擒獲渠魁既得其餘  
黨自必紛紛解散不可因匪徒分路滋擾將官兵  
零星派撥轉致疲於奔命此爲最要畢沅本係書

生未嫻軍旅惠齡雖曾歷戎行究恐不能諳練但  
現在簡派乏人且畢沅惠齡係該省督撫此事專  
交伊二人督辦務宜加倍奮勉董率弁兵直搗賊  
巢速擒二首逆以期一舉撲滅至湖廣地方上年  
雖屬豐收但枝江宜都長樂長陽東湖當陽遠安  
七縣現經匪徒四出滋擾未便照舊開徵除就近  
諭知戶部外並著畢沅惠齡卽行謄黃出示將此



七縣應徵錢糧俱先子緩徵俟平定後再降諭旨  
其被賊焚搶之處並妥爲綏輯勿任稍有失所使  
知肆逆者法所必誅安分者恩所必逮以副朕厯  
念災黎嘉惠善良至意其隨同防禦之鄉勇及爲  
官兵幫助聲勢者量加賞賚外如有實在出力打  
仗或奮勉擒拿賊匪者酌給鹽菜口糧並照營兵  
加之獎賞使鄉勇等知所鼓勵人人感奮爭先於

剿捕自更得力再前年福康安查出大寧縣民人  
謝添繡等與湖北竹谿縣之王占魁等傳習邪教  
因而究出劉之協一犯現尙在逃今聶傑人等聚  
衆滋事地方與川省湖北鄖陽相近該犯等或卽  
其同黨亦未可定劉之協若果逃往該處藏匿經  
此一番查辦轉可拿獲更爲一舉兩得該督等當  
密爲留心

臣等謹案自古光天之下頑讒並生除暴詰  
奸正以安戢良善此聖人所爲不得已而用  
兵也白蓮教匪聶傑人等本係愚氓惑於邪  
說自作不靖遂以烏合之徒蹂躪鄉里

皇上命將出師

指授方畧軍書旁午

宵旰籌謨無非以保護黎元登諸衽席茲因枝江等

七縣猝遇賊氛閭閻未免失所於甫經剿辦

時卽蒙

厯念民艱

特令將正賦錢糧先予緩徵伏讀

諭旨云肆逆者法所必誅安分者恩所必逮仰見

如天之仁隨時燾昌使凡血氣心知之屬罔不知所

畏懷至劉之協一犯先於邪教案內逮捕脫

逃今以他省事發

諭知大吏留心一併訪拿其後果於豫省弋獲尤見  
至誠之明幾先洞燭彼兵家術數之說奚足窺測萬  
一哉



欽定剿平三省邪匪方略正編卷二

丙辰年

二月二十三日

己亥

畢沅惠齡奏言據委弁等探

知聶傑八等遁入灌灣腦一帶於相距二十餘

里之太和山聚衆千餘在北面山坳搭蓋草棚

防守由方家大山後抄取小路約十餘里始出

山口十五日丑刻

臣

惠齡督率副將額勒金保

叅將許文謨等密從方家大山後覓路前進

臣

畢沅仍在方家大山營盤相機策應官兵等奮  
勇爭先直至太和山頂天已黎明見所搭草棚  
布滿山坳用火箭火彈拋擲烟焰四起逆匪等  
倉惶驚竄官兵從山頂壓下殺死二百餘人各  
匪四散奔逃官兵乘勢追剿守備鄧興相林朝  
輔衝入賊隊格殺匪目劉盛美鄭一松二名守  
備關存等生擒匪目曹統文李正元梅庭輔三



名匪夥閔谷安等三十六名臣畢沅由大路率

兵會合將曹統文等犯卽於軍前正法梟示查

太和山距灌灣腦雖尙有大山數重但係匪巢

門戶從此整兵前進極爲便捷惟聶家河地方

爲匪徒後路今臣等已統兵扼其要道逆匪自

必竄入聶家河一帶該處祇有縣丞蔣振萬千

總劉春帶兵一百八十餘名及鄉勇人等恐不

足以資堵禦查宜都地方前恐逆匪分投滋擾  
派有滿漢官兵六百餘名在彼防守茲逆匪等  
被官兵阻遏救死不暇斷不敢復出擾害宜都  
可保無虞

臣

等隨將該處滿漢官兵內調撥三

百名檄委防禦色拉布等帶領前往聶家河與

蔣正萬等會合一處設立營卡相機剿捕至東

湖當陽遠安等處匪犯均因存營官兵處處空

虛因而乘機蠢動現在署中一東縣黃應文等帶  
領兵丁鄉勇已將宋家嘴匪徒剿散當場殺死  
匪徒二十餘名割獲首級四顆生擒賊匪楊添  
祥等十一名又於沿途盤獲奸細楊家學等四  
名解赴郡城交臬司審辦現帶兵丁鄉勇往對  
馬山相機剿捕所有往援當陽之滿兵二百名  
往荊州副都統德福來咨已令起身不日可抵

該縣其遠安一縣已撥兵一百名前往防守臣

等一俟將犇傑人等掃蕩後即移兵前往逐一

剿洗仍飛飭各該縣察看匪徒情形如果力能

擒捕自應相機剿殺不可稍有玩縱

同日汪新奏言臣於十四日接據當陽遠安兩

縣稟報境內均有匪徒焚搶臣之事查當陽縣

距荆郡一百六十里其適中處所地名河溶民

居稠密素稱殷庶之區且爲荊州四達總路因  
飭江陵縣知縣魏耀荊州守備羅大炳選帶壯  
役幹兵馳赴該處招集壯勇六百餘人晝夜嚴  
防並無闖入但扼要之路雖經布置而當陽城  
守空虛未免危急正與荊州副都統德福商遣  
銳兵星速往援適接督撫臣札稱業經知會襄  
陽鎮派兵馳赴囑再撥滿兵二百名前往隨宜

守剿臣立即料理如數登程嚴飭星馳前進十

七日接魏耀稟稱十五日晚賊匪攻破當陽縣

城黃令被害臣聞信之下不勝髮指查所撥滿

兵行抵河溶縣城已失現在飛飭前進相機克

復至河溶地方與江陵貼界除飭該令魏耀該

備羅大炳督率兵勇實力堵截外復與德福商

定再派兵六十名赴彼協守更於郡城二十里

外要地派員挑帶滿兵一百名紮營駐守藉以  
策應河溶而爲郡城游徼俾賊匪不敢妄生覬  
覷

同日河南巡撫景安奏言查河南浙川一帶均

與湖北鄖陽接壤山徑叢雜自應嚴密堵緝以

防賊匪分竄臣已派撥文武員弁協同該營汛

實力堵防臣現在挑選勁兵一千名赴楚俟送

兵起程後卽在南陽新野一帶接壤處所暫駐  
以壯聲勢均奏入

上命軍機大臣傳諭畢沅惠齡汪新曰此次畢沅惠  
齡所辦尙屬奮勉但首犯聶傑人等尙未就獲而  
當陽又有匪徒戕官之事未便卽將該督撫交部  
議敘著先賞給畢沅惠齡大小荷包其打仗出力  
分路防守之文武員弁均著該督等存記俟事竣



後一並咨部議敘滿漢兵丁著再加賞一月錢糧  
所有打仗及分防鄉勇人等亦著查其出力者分  
別賞賚或酌給鹽菜口糧俾共知鼓勵至當陽縣  
存兵無多賊匪倉猝突至致有疎虞原難責該令  
以失陷城池之罪但該處縣城失守時若該令實  
因力盡被害或罵賊捐軀自應照陣亡例從優議  
卹若祇係猝不及備被賊戕害祇應照例給予卹

典如爲賊所拘或尙有求生之念致失體統則不  
治以失陷之罪已屬從寬豈可復使濫邀恩卹此  
等名節所關不可不於事定後澈底查明分別辦  
理用示勸懲又據奏侯將逆首聶傑人等掃蕩後  
卽移兵前往當陽等處所見甚是或枝江宜都一  
帶尙需搜捕畢沉惠齡不能分投督辦已另降諭  
旨令恒瑞帶領滿兵二千名取道興安由鄖陽前

抵當陽等處協剿再鄂輝係營員出身又屢歷戎  
行於地方營伍事宜尙爲諳悉已令其馳驛前赴  
湖北聽候畢沅等調遣俟該處叅遊等缺出時酌  
量奏補至荊州滿兵節次檄調三千餘名該處爲  
楚省南北總匯之區汪新德福均係大員尤應加  
意督率防範不可稍有疎懈

同日

上命軍機大臣傳諭西安將軍恒瑞曰湖北東湖當陽三縣現有邪教聚衆猖獗該處存兵無幾荊州駐防滿兵陸續調去恐尙不敷剿捕著恒瑞於駐防滿兵或本標下綠營兵內挑派二千卽親自統領速赴東湖當陽剿擊匪衆但鄖陽地方前歲卽有邪教傳習之事恒瑞此次領兵當由興安取道鄖陽揚示軍威該處設有匪徒亦可使知所畏懼

二十五日

辛丑

畢沅惠齡奏言本月十八日子刻

天恩

接據汪新札會十五日當陽縣城被賊殘破知

縣黃仁業經殉難

臣

等接閱之下駭恨惶急無

地自容查當陽距荊州府城甚近該郡爲南北

數省水陸通津要道滿營存兵有限賊勢乘虛

甚有關係附近各屬俱係兵單將寡在在可虞

而現在所帶之兵除分防各要隘外前敵僅有

兵八百餘名萬難分抽以致愈形單薄且察看  
近日賊情紛紛四擾醜類繁多必得厚集兵力  
兼有熟練軍旅大員統領始可迅就殄平

臣畢

沅與臣汪新素未經歷戎行副都統德福鎮守

滿城亦關緊要而么膺草竊又不敢懇乞

天恩

特派大臣督辦臣等查湖南鎮筵鎮總兵富志那現

由湖南軍營奉派前來一二日內必可趕到俟

其到時卽令星赴當陽等處痛加剿捕較爲得

力再前日奏調豫省之南陽鎮陝省之興漢鎮

各兵一千名河南距楚尤近較易接應臣畢沅

現於拜摺後星夜就道先至荊州就近調度察

看機宜隨時策應臣惠齡仍在宜都軍前設法

搜捕一俟首逆全擒卽行帶兵馳往會同搜剿

奏入

上命軍機大臣傳諭畢沅惠齡恒瑞曰畢沅辦理此事未能確有把握而惠齡亦不免意存觀望枝江逆匪經官兵追剿竄入山內勢已窮蹙正可直前搜捕畢沅等前次所調官兵自己陸續抵營計續調及派往之兵共不下四千名何以尙未將首逆剋期擒獲至當陽等處有需兵力昨已降旨令西



安將軍恒瑞帶兵二千由鄖陽一路星速馳往該處又加以興漢南陽二鎮之兵聲威更壯著恒瑞於途次察看情形何處有賊匪屯聚卽先赴該處奮力剿殺使賊匪不再蔓延至鄖陽竹谿一帶前歲卽有傳習邪教之案甫經查辦而該處復有教匪滋事可見此等邪教易於煽惑卽使發遣他處該犯等怙惡不悛仍復私相傳習不得不嚴辦示

懲恒瑞帶兵經過鄖陽一帶如有邪教輟黨附和  
滋事者卽當概予殲除不可稍存姑息以致日後  
萌蘖復生畢沅現赴荊州務卽將賊匪剿除盡淨  
收復當陽惠齡亦當迅掃首逆移兵會合速靖餘  
孽不可稍涉遷延再當陽縣知縣黃仁被賊戕害  
固因存兵無多以致縣城失守但該縣官兵雖經  
調派豈竟無守城之兵且該縣亦有胥役及民壯

等何至毫無防禦坐視不救從前如蘇四十三段  
文經等皆係衙役是以易於勾結滋事此次邪教  
等聚衆不法或該胥役等竟有與賊匪同教暗中  
勾結者亦未可定不可不嚴行查辦

二十八日甲辰畢沅奏言查遠安連接當陽且貼

近荆門州該州爲驛道通衢甚關緊要隨飛撥  
過荆之竹谿營兵一百名星赴荆門彈壓並以

前撥滿兵二百名赴江陵當陽接界之河溶地方截住賊匪來路並爲就近進取當陽之計但現旣調用滿兵必得本營大員管領始可鈐束得力因思荊州副都統成德熟練行陣現在自京回任已入楚境臣隨飛劄知會令其直赴荆門會齊豫兵分道進剿又帶往宜都之荆宜施道高杞於二十日帶兵一百名趕到荆郡臣先

經酌抽瀘溪兵一百名亦據原任長沙協副將黃瑞帶到已令該道協等帶領先行前進一俟各路到齊約定日期兩面夾擊但教匪人數衆

多臣現細訪當陽等處首夥是否卽係聶傑人

一黨抑別有首惡以便按名捕戮察看事勢卽剪除巨兇之後搜捕餘黨尙須厚集兵力以期淨盡根株是以臣與惠齡業已知會豫陝二撫

臣各速調遣兵一千名前來協剿再當陽縣令  
黃仁之子黃士騏將縣印呈繳前來詢稱賊衆  
攻城伊父見勢危急囑令乘間攜印呈繳本月  
十五日晚城陷父戕伊卽改裝匿印冒死逃出  
其同城教職典史及眷口人等未知下落現在  
探查

同日汪新奏言據襄陽縣稟南陽鎮頭起官兵

業於本月十九日入境隨後各起陸續邇來

臣

現在按站迎催以期迅速合剿再查荆郡與當  
陽接境捍衛宜嚴先經預飭員弁於水陸要隘  
分帶兵役實力堵守復以江陵貼近之河溶地  
方居民殷庶且爲通荆總路先經飭令知縣魏  
耀馳赴該處傳集紳耆多招鄉勇嚴爲防禦疊  
據稟報該處有副榜羅思泳監生羅思潛二人

家業殷實自願捐貲雇募鄉勇於附近要地分

設三卡極爲嚴密經

臣

出示嘉獎復恐鄉勇多

名或有藉端讐殺情事隨又曉示如遇賊人糾

衆來擾准聽立時格殺其僅止數人潛來窺伺

者只許生擒該鄉勇等俱各踴躍凜遵號令連

日當陽逆匪不時糾衆竄擾俱經魏耀督率兵

勇奮力迎敵殺斃多人又因萬城筭窪龔家



港沙市等處亦係要地荊州府知府崔龍見已  
親歷招諭各集鄉勇四五百人及二三百人  
律防禦亦俱具報屢有殺獲均奏入

上命軍機大臣傳諭畢沅惠齡汪新曰聶傑人等在  
大江迤南枝江宜都等處滋擾而江北之東湖當  
陽遠安等處又有逆匪嘯聚蔓延數州縣中隔大  
江斷非倉猝通信所能同時並起必預有彼此勾

結約會情事况賊匪互相雄長其勢散渙豈能不  
約而同是否聶傑人卽係各路賊匪總頭目抑或  
另有其人且此等邪教不過爲惑衆歛錢起見在  
市集鄉村搶掠已屬愍不畏法乃竟陷城傷官意  
欲何爲該督撫獲犯後自應將此等情節詳訊確  
供何得遽行正法著傳諭畢沅惠齡嗣後如有續  
獲之犯務須訊明起釁根由具奏勿再含混再陝

西之兵由鄖陽一帶行走河南之兵由襄陽一帶行走會合堵剿賊匪自無虞其北竄惟川東一帶皆與湖北接壤前據孫士毅奏派委道員在川東一帶彈壓並著該署督添派鎮將會同留心稽察堵截勿令竄入川境

同日

上諭內閣曰湖北當陽縣逆匪滋事不過烏合之衆

現在大兵雲集無難立就殲除惟該縣黃仁當賊  
衆攻城之時見勢危急囑令其子黃士騏改裝藏  
印乘間逸出赴畢沅處呈繳旋因城破被戕實堪

嘉憫黃仁著加恩照知州例議卹

二十九日乙巳畢沅奏言現在南漳保康亦有零

星匪賊已飭襄陽鎮臣彭之年就近帶兵前往  
策應該一二處鄉勇甚多必能得力惟探知南陽

鎮頭起官兵二百名於二十一日至襄陽呂堰驛隨後四起齊到稍需時日若俟到齊後始會本省官兵進攻不但賊人聞風必有防備且慮緩一日收復卽多一日蔓延因思鎮筸鎮富志那已暫留枝宜軍營剿賊副都統成德亦未便坐待現在有臣自瀘溪抽回兵一百名枝宜帶來兵一百名又先經汪新德福派往河溶防守

滿兵二百名又隨臣親兵六十四名共滿漢兵

四百六十四名已派荆宜施道高杞原任長沙

協副將黃瑞等統領今日自南省大營派來之

遊擊烏爾卿額什圖二員亦已馳抵荊州臣察

度事勢自應就此刻已到官兵迅速前進收復

當陽隨於二十二日由河溶一路迅速疾走親

身督率官兵漏夜進發惟有相機妥籌申嚴紀

律一鼓作氣以期滅此朝食奏入

上命軍機大臣傳諭畢沅惠齡曰現在河南頭起官兵先已到楚其隨後各起自己陸續趕到賊人係烏合之衆火器又少易於撲滅畢沅惟當督率文武員弁奮勇剿捕將此案爲首各犯迅速拏獲俾賊匪不致蔓延南漳保康二處又有零星賊匪畢沅亦應趁此兵力早爲搜捕此次匪徒滋擾卽係

前年邪教黨與畢沅辦理未能盡絕者此次若能

迅速蒞事尙可將功抵罪至惠齡係蒙古旗員身

任巡撫尤當倍加奮勉卽不能統兵迅掃賊巢將

首犯聶傑人劉盛鳴二犯擒獲亦應將如何籌辦

進剿及一切布置機宜速行具奏何竟安坐軍營

一籌莫展惠齡著傳旨嚴行申飭畢沅俟江北賊

匪剿盡後卽當回至太和山幫同惠齡進剿至恒



瑞現已帶領西安滿兵由鄖陽一帶前赴當陽並  
著傳諭該將軍俟江北賊匪掃除後亦卽前赴宜  
都枝江幫同畢沅惠齡合力搜捕灌灣腦一帶逆  
匪

三十日丙午惠齡奏言探得聶傑人等於深冲口

鳳凰山添派匪徒踞守該二處山高路險爲緊  
要隘口必須一鼓剿散方可直逼賊巢適鎮筸

鎮總兵富志那已至太和山軍營

臣

卽於二十

一日黎明將兵分爲兩路令該鎮統領叅將許

文謨佐領額貝等進取鳳凰山梁

臣

統領副將

額勒金保等進取深沖口均在鳳凰觀會合官

兵直撲深沖口賊卡用礮轟擊剿散賊匪與富

志那在鳳凰山梁會合見山後逆匪結隊直撲

前來千總劉健標先將執旗賊目射死守備劉

管城拏獲賊目涂聯芳一名各官兵乘勢剿殺  
正在長驅深入之際逆首聶傑人見官兵驟至  
勢不可當料難逃匿卽帶同匪夥熊太山等五  
人至軍前叩頭乞命臣當委員將各犯解赴營  
中看守仍督率官兵奮勇進剿逆匪向內山逃  
遁臣等將官兵於深沖口劄駐隨提聶傑人訊  
問據供伊子聶池向拜張宗文爲師學習白蓮

邪教張宗文之師張正謨因地方官嚴查邪教

惟恐到官問罪適見各處官兵俱往湖南出征

遂糾約同教陰圖不軌以聶傑人住居山中家

道稍裕房屋寬大借其家屯住並推該犯爲首

本年正月初八日張正謨等邀夥數百人齊至

其家攜有白布旗帽黃綾符帖鎗刀等物藏貯

屋內被該縣訪聞會營往拏張正謨等率衆抗

拒又派人各處搶刦糧石並擄掠居民入夥因  
聞官兵到來先避入江家壩藏匿聶傑人屢見  
官兵剿殺伊子聶池亦被鄉勇殺死心生畏懼  
早圖投出俱爲張正謨攔阻凡有逆謀俱係張  
正謨主持劉盛鳴亦聽其約束張正謨手下尙  
有張宗文劉宏鐸張正瑞向瑤明等俱係心腹  
管事現在男婦大小約共一萬餘人內同教者

二千多人餘皆擄掠上山逼令入夥助勢等語

臣

查聶傑人窩聚匪徒謀爲不軌實屬罪大惡

極今見死亡在卽始行投出求生並以一切逆

謀均諉未獲之張正謨明係恃無質証任意狡

賴該逆犯年已六十八歲未便嚴加刑訊當卽

由營押解回縣送京辦理其餘拏獲各犯隨於

軍前正法總兵富志那追射賊匪時左手指受

有鎗傷尙不甚重再東湖等處逆匪先經署巴  
東縣黃應文會同東湖縣何學青遊擊邱作訓  
帶領兵勇將宋家嘴匪徒剿散茲據臬司張長  
庚稟稱該員等於十七日將對馬山首犯何宗  
訓及其子何示能並匪夥十五人殺死生擒二  
十三名又於二十日在楊家垸見有匪徒數百  
人頭纏白布屯聚對山經外委歐凱爭先搶上

將執旗之賊目砍死又手及數人兵勇乘勝而  
前鎗礮齊發登時殺斃二百餘人餘匪紛紛潰  
逃追至羅家沖又殺死一百餘人生擒男婦一  
百二十六名口奪獲礮位鳥鎗矛刀馬騾等項  
無算並將獲犯解至宜昌審辦除飭該司將匪  
犯審明錄供分別正法一面轉飭各員等務將  
各匪首夥全獲以絕根株奏入



上命軍機大臣傳諭畢沅惠齡曰惠齡生擒首逆聶傑人並連奪賊卡所辦俱好但現據聶傑人供尙有傳習白蓮邪教之張正謨係此案爲首之犯未經就獲而餘黨亦未搜查淨盡不便遽行降旨議敘著先賞惠齡玉搬指及大小荷包以示獎勵所有此次打仗滿漢兵丁著再賞給一月錢糧至富志那甫到軍營卽帶兵分路殺賊手指受傷現仍

隨同惠齡帶兵前進殊屬可嘉前已賞戴花翎著

賞給玉搬指蟒緞大小荷包其射死賊目之千總

劉健標卽以守備陞補拏獲賊目之守備劉管城

卽以都司陞補又東湖一路砍死賊目復手及數

人之外委歐凱著卽拔補千總至聶傑人供本欲

早圖投出爲張正誤所阻等語顯係該犯初欲負

隅抗拒及見官兵四面圍剿不能逃竄始行投出

此等謊言斷不可信應俟該犯解到時再向嚴鞫  
自無從遁飾也

Blank column

Blank column

Blank column

Blank column

Blank column

Blank column

Blank column

欽定剿平三省邪匪方略正編卷三

丙辰年

三月初一日

丁未

陝甘總督宜綿奏言本月十七

日接湖北撫臣惠齡咨調興漢兵丁一千名前

往剿捕現在撫臣秦承恩業已星夜僱赴興安

提臣柯藩適因興漢閱兵亦先期前往

臣

當卽

飛札提臣令其會同撫臣於興漢鎮標內挑派

精壯兵丁一千名並遴選曾經出征打仗之將

弁統領攜帶鎗礮軍火弓箭鍋帳等物速由襄  
河順流直下前赴荊州聽候調用臣又委請咨

陛見之新授巴里坤總兵徐昭德令其暫緩進京先

由小路馳往與漢一帶悉心訪察如有賊匪竄

入卽可堵截查拏臣亦於二十日白蘭州起程

藉閱固原陝西營伍爲名前赴西臣以便與撫

臣酌商一切

同日秦承恩奏言臣因巡查地方於本月二十

三日在興安府城接准畢沅惠齡咨調與漢鎮

兵一千名當卽如數挑備交署總兵文圖統領

前往已於本日全數起程現在漢水初發建瓴

直下可期迅達荊州均奏入報

聞

初二日戊申畢沅奏言臣因收復當陽不容刻緩

於二十四日督率各官兵先在河溶整頓齊集  
卽帶領兵勇星夜前進賊人聞官兵進剿卽分

匪徒千餘人在相距當陽十里之蘇家河北岸  
紮卡抗拒查蘇家河爲當陽咽喉要道若不掃  
除該處屯匪我兵不能過渡南去卽不能直薄

城身因於二十五日黎明派道將等分隊衝出

臣  
隨後督押前進人人奮勇殺賊二百餘名賊



人覓水棄卡逃回我兵當卽一面搭造竹木浮橋過河追趕時已昏黑適大雨如注因思我兵已過蘇家河要隘已得從此徑趨當陽可期無阻而賊人敗回之後並未進城於關廂外四五里地方糾聚潛伺希圖阻隔攻城之路並聞賊人製有木礮分設城門適據襄陽道府稟報南陽鎮頭二起兵四百名二十五六日先後將抵

荆門州臣已飛飭直趨當陽一二日間可以到

齊聲勢聯絡會合夾攻更可尅期殲戮至豫省

之三四五起兵六百名及續調之一千名臣已

飛檄嚴催兼程前進隨到隨飭應援現在被賊

滋擾各屬俱就存營兵丁輔以鄉勇令其竭力

堵禦以資固守再各屬匪徒乘虛勾結逐漸蔓

延近日宜昌屬之興山鄖陽屬之房縣施南屬

之來鳳均有逸匪滋擾臣與惠齡已飛飭襄陽

鎮彭之年施南協副將樊繼祖速往分捕而現

在兵單將少派調不敷因思奉

旨派出之侍衛原任將軍舒亮久歷戎行從前與臣

共事多年素所知悉今不日行抵楚境臣已飛

札囑其暫留楚北現在收復當陽即可就近馳

來商同剿捕至臣前後所調陝豫兵四千名是

卷之三  
四  
否足敷分捕尚難預定  
臣現又密札知會陝西

撫臣秦承恩以興漢地接楚疆亦關緊要不便

多調或於西安兵內再備勁旅一千名  
臣當察

看此處情形如實有不敷隨時咨調接應均奏入

上命軍機大臣傳諭畢沅惠齡曰昨據惠齡奏枝江

首逆聶傑人已經生獲而該處及當陽一帶尚有

賊匪仍前屯聚是惠齡所奏傳習邪教之張正謨

實爲此案首犯大約聶傑人如湖南苗匪內之吳  
半生爲衆所推其張正謨一犯如石三保石柳鄧  
等爲造逆之正犯必應生獲者惠齡務須將張正  
謨迅速查拏則首謀就擒其餘夥黨自必潰散畢  
沅亦當將當陽滋擾賊匪星速剿除至該督前後  
所調各省兵丁已有四千名嗣又降旨令恒瑞帶  
領西安漢兵二千名由鄖陽一帶前赴當陽兵力

已爲壯盛今畢沅以興漢地接楚疆不便多調札  
知秦承恩令於西安兵內酌調一千名自係未經  
接奉派調西安滿兵之旨故有此奏此次賊匪糾  
衆多人其中被賊誘脅者諒復不少畢沅等當嚴  
行查究如係抗拒傷官焚搶村莊及輾轉勾結爲  
逆者俱屬罪無可宥均須悉數嚴辦其餘爲賊匪  
誘脅逼人邪教者不過分發各處爲奴若祇係無

知愚民誤被誘惑旋<sub>一</sub>改悔者概不必深究庶自  
新有路更可免株累而安衆心畢沅惠齡務宜詳  
細分別毋縱毋濫

同日景安奏言<sub>臣</sub>查河南通省額設烏鎗前後

兩次赴楚官兵帶去六百桿現復撥運八百桿  
共計調用一千四百桿軍火利器本省設備亦  
不可缺<sub>臣</sub>隨飭各標營趕緊勒限補造還額所

有運往荊州烏鎗八百桿諒已敷用再續調赴

楚官兵一千名均已於本月二十三、四等日各

田該營分次起程月內頭二起即可趕抵南陽

奏入報

聞

初三日巳畢沅奏言襄陽為全楚門戶荊州為西

數省通津宜昌鄖陽為川陝屏障皆屬四達之



區此時荆襄鄖宜施五府及荆門一州其已經  
有賊之區固須搜捕卽未經萌動處所地屬毗  
連卽應戒嚴密備且逆賊情同鬼蜮暗播謠言  
輾轉致惑其中紳士義勇合力齊心團練擒殺  
日以百計實多出力之人但深山窮谷之中不  
少奸惡匪徒卽鹽梟土棍本非邪教而聞風肆  
搶有利可圖亦難保不附和入夥至懦怯愚民

被脅相從雖非情愿懾以兇鋒勢亦日逼日多

蔓延可慮臣雖節次出示飛布傳旗諭以隣省

大兵分道雲集不難卽刻殲除是以民心稍定

但閭閻之所以倉皇者固由逆匪猖獗到處脅

逼不從入夥卽被戕害亦因兵守空虛一無可

恃而賊匪探知其故輒卽虛張聲勢牽制我兵

關係實爲不小因思現在調集本省及陝豫各

兵概爲剿捕之需尙恐不敷分遣實未能留駐

要區爲控制地方之用而各處逆賊卽使迅速

殄滅反側初平亦必須重兵駐守頃又據報保

康房縣穀城來鳳處處滋擾并傳聞保康來鳳

逆匪蹂躪尤甚臣派去援兵得到與否尙未可

定實有顧此失彼之勢臣向旣未厯戎行以六

府州屬賊氛之廣惠齡專力枝宜正在喫緊又

未得分身來此合無仰懇

天恩俯鑒事機重大

特發京營勁旅三千名於襄鄖荆宜四府喫緊重地

酌量分駐庶幾鎮定民心有所倚恃俾逆賊不

能煽動至京兵乘坐大車直抵襄陽卽於襄郡

留駐一千名其餘二千名

臣

已飭備船隻於樊

城登舟由漢江水道分赴鄖陽荆州宜昌等處

無須夫馬甚爲便捷再分搜逆匪急須乘此賊  
心未固器械未全迅加掃蕩斷不宜遲

臣

已飛

咨陝撫臣秦承恩再調西安等處兵二千名迅

速來楚以期分投洗蕩速淨根株再副都統成

德已經回荆

臣

卽囑令速赴當陽會同鎮道帶

領官兵進剿

同日秦承恩奏言二十四日據白土路都司趙

禧稟稱接准湖北竹谿縣知會探得竹山縣境  
現有匪徒燒搶劫獄竹谿縣之葛籐口爛柴溝  
等處亦有匪徒聚眾滋擾移請救援

臣

查竹谿

竹山滋事之處距陝省興安府最近距湖北荆  
宜二府稍遠因思興漢鎮赴楚兵丁均係挑備

精銳之師甫經起程尙在興安境內

臣

隨飛札

署總兵文圖就近先行取道馳往竹谿竹山痛

加剿洗臣亦卽酌帶存汎兵丁親往接壤要隘

督同文武員弁嚴行堵截以爲聲援並防逸犯

竄入陝境臣一面咨會督臣宜綿署西安將軍

花尙阿派調滿漢官兵各一千名由南山小路

兼程來興相機接應一面咨會湖北督臣畢沅

等兩面夾攻以期迅速撲滅

同日西安將軍恒瑞奏言臣於二月二十五日

接奉

諭旨當於西安滿兵內選派一千名屬下綠營兵內

選派一千名卽於二十九日起程撫臣秦承恩

現在興安當將鄖陽及當陽東湖現在情形並

由何路趨行之處向秦承恩會商酌量前往再

西安省城亦須大員駐彼經理現在烏魯木齊

都統永保來京



陛見即日可抵西安臣已飛札囑令進行到時暫行

留駐聽候

諭旨均奏入

上命軍機大臣傳諭畢沅惠齡宜綿永保秦承恩曰  
畢沅已於蘇家河殲斃賊匪二百餘名正可乘勢  
力圖進取今因荆襄等府俱有賊黨並播散謠言  
冀圖搶劫復行請發京兵前往駐守京營勁旅打

仗殺賊原可以一當百若祇令前往防守則湖北  
地方遼濶村莊要隘在在需兵無論簡發三千不  
敷分布卽十倍此數亦不足用况京城距湖北路  
遠非惟曠日持久緩不濟急京師重地先已駭人  
觀聽且經過直隸河南二省兵丁及跟役等人數  
衆多沿途支應未免多有擾動而帶兵之員一時  
亦難得其人畢沅等前後所調河南陝西及本省

滿漢兵丁已有六千餘名又有恒瑞帶領西安滿  
兵二千名馳往會剿今據該督奏稱現又飛咨陝  
撫再行添調兵二千名是各處兵丁到齊統計已  
有萬餘儘足敷剿捕之用恒瑞曾歷戎行帶兵自  
可得力今畢沅因各州縣紛紛稟報未免張皇失  
措不能得有把握該督職任封圻均資調度若胸  
無定見先露驚張則將弁兵丁及州縣等愈覺無

所倚恃而民情亦不免倍加惶惑賊匪更易生心

所關非細本日據恒瑞奏永保由烏魯木齊來京

業經札知速赴西安現在湖北旣須大員帶兵永

保曾經軍旅著卽由驛遄行同恒瑞帶兵從鄖陽

一帶行走將有賊處所先加搜剿馳抵當陽與畢

沅會合協同剿辦又有舒亮鄂輝先後派往伊二

人俱係帶兵熟練之員均可得力此時畢沅總當

持以鎮靜不可稍露聲色朕亦不望其帶兵打仗  
惟應督率弁兵悉力守禦鎮定人心不可冒昧輕  
進稍致疎虞湖北地方素稱殷庶紳襟富戶當此  
奸民滋擾自必團練鄉勇於村莊要路設法防守  
各保身家此次畢沅摺內卽稱荊州襄陽等處紳  
士義勇合力齊心擒殺賊匪日以百計可見賊匪  
雖乘機肆擾而民心固結人自爲戰賊匪斷不能

任意鳴張加以兵力厚集民心益壯祇須將首逆  
擒獲其餘脅從自可不攻而潰所有該處團練殺  
賊之紳士義勇俱著畢沅擇其出力者傳旨獎賞  
俾益知感奮再本日據秦承恩奏親帶兵丁前往  
陝楚接壤要隘堵截現在陝西省城並無大員昨  
據宜綿奏稱已於二月二十日自蘭州起程前赴  
西安駐劄卽著該督辦理糧餉策應彈壓等事

初六日壬子畢沅奏言臣於二十八日督飭將弁

率領兵勇冒雨進發斃賊二三百人將賊卡數處全行搶占賊遁入城齊集堞口負嵎固守我兵追薄城身用鎗礮攻打但以四百餘名之兵稍形單薄聞南陽鎮阿克棟阿帶兵四百名今日可到又東湖剿賊之武昌府同知常丹葵屢經殺賊該處賊已潛匿而當陽正與接壤恐賊

人卽從此路竄出先經臣密令酌帶兵六十名

鄉勇五百名星速前來已於二十八日趕到當  
陽西南之長坂坡紮住營盤堵截去路三路兵  
勇會合圍攻並將大礮轟摧聲勢極爲聯絡此  
時城內賊匪聞尙有二三千人業被官兵四面  
圍住外賊無從應援內賊不能竄逸已如釜底  
遊魂萬分窮蹙天氣稍晴官兵更易舒展自可



卽行掃蕩又遠安縣知縣石燼守備張元善殺  
死賊首趙治國並其子趙世貞此外鄉勇自行  
殺斃之賊不可勝數惟鄖陽施南一帶在萬山  
之中如保康竹山等屬向無城垣存汛兵丁多  
不過二三十人少者數人茲聞該二縣一帶逆  
賊猖狂到處蹂躪甚爲危急現在陝省興漢鎮  
兵尙未接到啟程之信而初次所調豫兵一千

名除赴當陽四百名外餘已分赴南漳穀城其  
續調豫兵一千名又已飛飭酌撥三百名速赴  
枝宜惠齡軍營其餘酌量情形分投援應臣飛  
檄分催豫陝二省未到之兵迅速前進以資分

剿

同日畢沅惠齡奏言二月二十四日據施南府  
知府法克晉稟稱來鳳縣司崗小坳地方有匪

徒數百人於各村莊搶劫該縣莊級蘭督同卯

崗巡檢沈懷楓召募鄉勇會營防堵懇請發兵

援應臣等查來鳳縣並無城垣與四川秀山縣

湖南龍山縣接壤該縣所屬之聶車坪與湖南

里耶相近臣惠齡於上年三四月間派委施南

協副將樊繼祖帶兵二百名駐劄聶車坪又撥

兵二百名委守備周言昇駐劄南省龍山縣之

里耶地方以成犄角之勢互相聲援今可崗等處既有匪徒竊發與聶車坪一帶相離甚近隨飛飭樊繼祖將該二處駐防官兵全數撤回卽令該將帶領速往搜捕二十七日復據法克晉稟稱該縣莊紉蘭身受重傷跌下河溝典史張寧亦受傷落河現據莊紉蘭之子莊念謀呈繳印信前來據稱莊紉蘭被害情形相同臣等不

勝憤恨查該縣僻處萬山係湖北施南邊界無

論臣等現帶各兵尙恐不敷分剿無可抽撥卽

遣兵往援亦屬緩不濟急惟聶車坪里耶二處

防兵共有四百名路亦便捷可以就近剿捕臣

等現復飛催樊繼祖速卽帶兵馳往相機剿殺

再頃據來鳳接壤之署咸豐縣知縣康又民稟

報該縣會同紳士招募鄉勇二三千人在緊連

來鳳地方節節分設卡座殺賊一百數十名擒  
獲六名卽行正法該處尙爲嚴密賊匪未敢竄  
入再舒亮業經暫留北省今查尙有頭等侍衛

關騰仰懇

聖恩將該員一體暫留湖北卽來宜都領兵剿捕

同日惠齡奏言

臣

於二月二十一日帶領官兵

剿殺深沖口鳳凰山賊匪連日清晨大霧迷漫

巳刻以後卽大雨如注至夜不休臣等傳知各

營將火藥等項時加烘焙又多用棕片等物將鎗礮火門厚加遮蓋如有賊匪前來務俟臨近再行施放茲於二十七日酉刻大雨淋漓之際忽有匪徒八九百人暗從內山順溝而出各執

鎗矛等械向頭敵營盤潛身窺探經守備林朝輔把總朱升鑑等等爲不知密率各兵將鎗礮

預備妥協暫未施以賊匪見無動靜一擁而上

林朝輔等卽時鎗礮齊發擊死賊匪數十名賊

匪驚退奔上對面山梁時臣與富志那率兵前

來分投剿殺又用火礮轟擊立斃一百餘人逆

匪卽返身奔竄外委蔡國良羅升任得勝陳大

榮等隨後冒雨追趕刀砍箭射殺死數十人割

獲首級二十三顆搶得矛鎗三十五件時大雨



不止天色昏黑因卽撤兵回營查賊匪現匿之  
灌灣腦高踞山巔勢極險峻並於山上多安木  
石進路各處暗埋地雷不特賊多兵少未便輕  
進而仰面上攻勢亦難於得手必須另覓路徑  
遣兵抄至賊匪山後暗爲埋伏仍於山前佯作  
進兵之勢賊匪自必向前抵拒不暇顧及後路  
以便伏兵從上壓下使其互相驚擾腹背受敵

而現在官兵僅止八百餘名難以分爲前後兩路先調南陽官兵均因襄鄖二府屬各有匪徒蠢動經督臣畢沅就近撥往剿捕至與漢之兵尙無入楚確信是以臣處尙無一兵到此而現

據各處拏獲匪徒內有供稱枝宜匪夥被官兵

圍困糾黨前來救援之語是現在枝宜逆犯實

爲衆匪附和之藪

臣

現飛催南陽興漢二鎮官

兵星夜趕緊前來不拘何處兵到即便分投擒  
捕均奏入

上命軍機大臣傳諭畢沅惠齡曰賊匪蟻聚蜂屯到  
處滋擾斷非各分黨類其中必有爲首最要之人  
爲之主持糾結或張正謨卽係賊首抑或張正謨  
之外另有主謀爲首者俱未可定現在當陽賊匪  
業經官兵四面圍定不能逃竄俟拏獲該處賊匪

卽可將賊首姓名訊出務當設法生擒解京處治  
至當陽賊匪於攻擾縣城後若復四出分擾轉費  
搜拏今竟在城潛匿正可聚而殲旃至來鳳縣並  
無城垣該縣莊叙蘭典史張寧帶兵無多倉猝遇  
賊衆寡不敵莊叙蘭身受重傷復經其子呈繳印  
信並稱伊父被害情形情殊可憫著該督等卽照  
當陽縣黃仁之例於事定後咨部優卹其子並著

送部引見典史張寧受傷落河並著該督等查明  
如張寧亦已被害亦一體咨部優卹現在所調河  
南官兵業經畢沅截留應用而惠齡一路正需分  
兵進攻著畢沅卽飛催恒瑞及署興漢鎮文圖帶  
領滿漢官兵加緊遄行到楚應用或河南後到之  
兵亦可如畢沅一路酌量兵力已敷搜捕續調官  
兵速撥至惠齡軍營以便分路進攻